

纯
常
子
枝
语
神
聊
题

純常子枝語卷二十六

萍鄉文廷式撰

宋潘闓有逍遙集案闓事宋史見宦者王繼恩傳 四
庫提要引江少虞事實類苑云太宗時賜進士第後坐
事亡命眞宗時捕得之釋其罪余案泗水潛夫武林舊
事卷五西湖三隄路有先賢堂名仰高祠許由以下其
四十人刻石作贊具載事迹中以寶慶初巴陵之事謂
潘闓有從秦王之嫌遂去之是闓之亡命實因秦王較
之李白陷於永王璘尤爲非罪宜崇甯閒黃靜刻其酒
泉子詞而以謫仙稱之也至古意一首刻唐詩者以爲

崔國輔作而永樂大典則題閬名

見提要

余案其詞云妾

有羅衣裳秦王在時作爲舞春風多秋來不堪著或閬
於亡命之後猶有不忘舊邸之思偶書古詩後人遂誤
編入集耶要之其人品甚高故南宋人猶以先賢祀之
矣 閬有尊前勉兄長詩云一家久寄浙江濱倏忽如
今二十春是閬固浙之寓公故浙人以先賢祠之

明張鼎思琅琊代醉編錄時人僻姓解州裒鉅鹿尼敷
施毘吉州蘭休甯醫人團一元絳州因安定稍鄰城糕
商邱衮洋縣瘴岷州治武定契蓬州毋白水問庶邑顏
滁州宥祖姓有有若後聖祖賜姓宥甯遠祿近在儀曹

有士來見姓名自牧沃泮定海人性急王襄敏作詩
規之

章實齋校讐通義立一書互見及裁篇別出之說目錄
家頗謂剽獲余閱明祁承燦書目略例實開其端略例
云古人解經存者十一如歐陽公之易童子問王荆公
之卦名解曾南豐之洪範傳皆有別本而今僅見於文
集之中惟各摘其目列之本類使窮經者有所考求又
如靖康傳信錄建康時政記此雜史也而載於李忠定
之奏議宋朝祖宗事實及法制人物此記傳也而收於
朱晦翁之語錄如羅延平之集而尊堯錄則史矣張子

韶之集而傳心錄則子矣他如瑣記稗記小說詩話之類附見本集者不可枚舉卽如弇州集之藝苑卮言宛委餘編又如馮元敏集之藝海洞酌經史稗譚皆按籍可見人所知也而元美之名卿蹟記元敏之寶善編卽其集中之小傳者兩書久已不行苟非爲標其目則二書竟無從考矣凡若此類今皆悉爲分載特明注原在某集之內以便簡閱按此卽章氏所謂裁篇別出者也又云同一書也於此則爲本類於彼亦爲應收同一類也收其半於前有不得不歸其半於後如皇明詔制制書也國史之中固不可遺而詔制之中亦所應入五倫

全書敕纂也既不敢不遵王而入制書亦不可不從類而入纂訓又如焦氏易林周易占林皆五行家也而易書占筮之內亦不可遺他如水東日記雙槐歲鈔陸文裕公之別集于文定公之筆塵雖國朝之載筆居其強半而事理之詮論亦略相當皆不可不各存其目以備攷鏡至若木鐘臺集閒雲館別編歸雲別集外集范守已之御龍子集如此之類一部之中名籍不可勝數故往往有一書而彼此互見者同集而名類各分者按此卽章氏所謂一書互見者也章氏與祁氏近同里閭不容不見其書乃遠述弱侯而近遺夷度殆不欲著其相

襲之迹乎若然則文史通義特重史德實齋爲有愧也
說文無由字說者多歧余嘗以由字爲軸之古文旣著
其說於前今又得數證詩齊風衡從其畝釋文引韓詩
作橫由東西耕曰橫南北耕曰由案橫由與廣袤相同
橫廣竝从黃由袤聲相近也一切經音義卷十一及二
十四竝引韓詩說東西曰廣說文衣部袤下云一曰南
北曰袤東西曰廣余謂袤假借字由乃正字南北曰由
者蓋取地軸之義地有南北極爲地軸無東西極也淮
南天文訓云欲知東西南北廣袤之數者立四表以一
方距又云除舉廣除立表袤是亦以東西爲廣南北爲

表與韓說同周官大司徒欲周知九州之域廣輪之數
鄭注輪從也案齊風衡從卽衡由是從與由同用正義
引馬融注東西曰廣南北曰輪儀禮旣夕記廣尺輪二
尺禮記檀弓廣輪揜坎廣輪卽廣袤廣袤卽橫由也旣
可謂之輪卽可謂之軸則由爲軸之古字昭然矣古往今來
曰宙宙字从由義亦取此

康熙二十二年山東按察司參議張能鱗奏請免貢鮓
魚云蒙陰沂水等處挑選健馬準備飛遞伏思一鮓之
味無關輕重天廚滋味萬品何取一魚竊計鮓產於江
南揚子江達於京師計程二千五百餘里進貢之員每

三十里一塘豎立旗竿日則懸旌夜則懸燈計備馬三千餘匹役夫數千人云云奏入奉 旨永免進供此疏與陋軒詩恰可互證

借根方爲東來法近時薛福成四國日記以爲譯語之誤此不足辨也余嘗謂中國曆算一變於乾竺再變於回回三變於歐羅巴並採摭菁華補我未備事具史傳無俟抑揚至於倡始之功自歸東土軒轅迎日義和定時五千年前昭著簡策何可誣也西人書云希臘天學之最創始者曰他勒他勒米利都人也童時卽喜觀天嘗誤落溝中保母援出之曰他勒何爲遠察天而近不

視地耶於時希臘人喜吟咏善論議講政治武備或言
性理然無治天學者獨他勒好言天凡天地之理其所
勦獲者多與今合先時航海者皆以北斗爲北極他勒
始斥其疏而以極星爲北極又推得太陽平徑亦密合
始倡言地爲球體預推某年日當食至時果驗此前人
所未有者黑鹿獨都史言米太與路底亞戰當晝忽昏
黑如夜遂罷戰蓋他勒預推此時當日食也邇時天文
家陪律上推周匡王三年秋分後七日午前日食月影
中綫由小亞細亞東北過亞美尼至波斯按小亞細亞
東北當時三國戰地也他勒之前希臘未知測天此必

本之他國曆表蓋非久測不能預知或曾得迦勒底表

未可知也

按他勒一譯作他里斯爲希臘七賢之一

夫當周匡王時中邦曆

學實已大著日蝕月食詩人詠之史傳載之知其常數矣而希臘天學乃始萌芽迦勒底表實東來之塙據耳岳倦翁桯史卷十一云番禺有海獠雜居其最豪者蒲姓號白番人本占城貴人旣浮海而遇濤憚於復返乃請於其主願留中國以通往來之貨主許焉歲益久定居城中獠性尙鬼而好潔平居終日相與膜拜祈福有堂焉以祀名如中國之佛而實無像設稱謂聲牙亦莫能曉竟不知何神也堂中有碑高袤數丈上皆刻異書

如篆籀是爲像主拜者皆嚮之按不置像設則非天主教號白番人各書或謂之白民友人黃林材印度劄記孟買民殷富商販遠方粵東所言港腳白頭回子也又云泉亦有舶獠曰尸羅圍貲乙於蒲按尸羅蓋卽暹羅然則閩粵之間西人占籍者當不少矣廣東通志云今懷聖寺有番塔創自唐時凡十六丈五尺每月禮拜亦有占城諸國人雜其間 歐陽文忠跋福州永泰縣無名篆云黃孝立言嘗至廣州見南蕃人以夷法事天日夕焚香拜金書字號爲天篆者正類此六一題跋卷十按此所謂南蕃人蓋卽程史之占城蒲氏矣

唐釋道宣續高僧傳

卷十

釋法藏俗姓安本安息人祖

世避仇移居南海因遂家于交廣之間後遷金陵而生

藏焉宋釋贊甯高僧傳

卷六

唐越州釋智藏姓皮氏西印

度種族祖父從華世居官宦後僑寓廬陵

通志氏族略二竺氏本天竺胡人後漢歸中國而稱竺

氏竺固爲後漢侍中西平侯風俗通云朝那東夷也其

後單姓那氏

風俗通姓氏篇錢辛楣廬
召弓張介侯均有輯本

張懷瓘書斷下

康昕字君明外國人官至臨沂令是漢晉之時外人來

居中國者旣已受塵卽登皇路婚宦之道廓然大同非

今日美利堅人區區爭利遂拒友邦所能及也列國自

謂文明如此等者豈能自免於貊道乎

隋書經籍志云漢末太守竺融

亦崇佛法

長沙周荇農閣學

壽昌

補注兩漢書余爲攷訂數十條今

附著余說者惟蔡邕傳作十意余以爲不作志者避桓

帝諱一條耳

此說近刻史學叢書錢獻之說似與余同

今閱邵二雲南江札

記云五帝本紀詩言意以意易志疑後漢人避桓帝諱所改也趙明誠書孔子廟置卒史碑云華陽國志後漢書注皆云趙戒字志伯此碑乃作意伯疑其避桓帝諱故改焉此二條皆足爲余說之證

漢書翟方進傳丞相進見聖上御坐爲起在輿爲下漢

舊儀云皇帝見丞相起謁者贊曰皇帝爲丞相起立乃坐皇帝在道丞相近謁謁者贊曰皇帝爲丞相下輿立乃升車典至隆重至宋太祖撤宰相坐位已有輕視大臣之心然姚令威西溪叢語云每大起居宰執侍班於垂拱隔門外東廊廬中三帥庭下聲喏捲簾及半起身答之祖宗之制也是宋時君臣猶有答禮之意

通志禮略漢制講武兵官皆肄孫吳兵法六十四陣旣還公卿以下陣雒陽前街乘輿到公卿以下拜天子下車公卿親識顏色然後還宮古語云在車則下惟此時施行余案此出蔡邕獨斷然獨斷以在車則下爲古語

則東漢天子已不爲宰相下車矣周亮工因樹屋書影
卷二云下車公卿親識顏色因巡校還耳此時不爲合古
語也宋時駕還宮門有勘契勘箭之制又宋相呂端卷
簾審視乃拜皆此

元史西北地附錄僅有地名魏默深海國圖志據經世
大典圖略辨方位然不詳者尙多洪文卿元史譯文證
補有說無圖讀者仍未瞭也日本重野安繹河田鯨撰
支那沿革圖其元代一圖云據獨逸卽德意志人所撰大略
可據矣今摹之如左圖闕

泰西測候之學遠過於古惟地震尙不能測而中國古

籍多言地動儀不可解也周公謹齊東野語卷十五云
後漢張衡傳地動儀以精銅爲之其器圓徑八尺形似
酒樽中有都柱傍行八道施關發機外有八龍首銜銅
丸每龍作一蟾蜍仰首張口而承之機關巧製皆在樽
中龍必置九州地分如遇某州分地動則龍銜之丸卽
墜蟾蜍口中乃鏗然有聲候者占之則知某地分震動
也北史信都芳明算術有巧思聚渾天欹器地動銅壺
刻漏候風諸巧事令算之無遺策隋臨孝恭嘗著地動
儀經一卷今皆無傳焉然以理揆之天文有晷度可尋
時刻所至不差分毫以渾儀測之可也若地震出於不